

Broj: 01-11-11-03771-11/2022
Sarajevo, 5.10.2022. godine

Na osnovu člana 72. stav (3), a u vezi sa članom 68. stav Zakona o javnim nabavkama Bosne i Hercegovine („Službeni glasnik BiH“, br. 39/14 i 59/22), nakon razmatranja preporuke Komisije za javne nabavke broj 01-11-11-03771-10/2022 od 30.9.2022. godine, po provedenom postupku konkurentskog zahtjeva za dostavljanje ponuda uz primjenu e-aukcije, Direktor Federalne uprave za inspekcijske poslove u ime ugovornog organa, donosi,

O D L U K U

o dodjeli ugovora drugorangiranom ponuđaču

I

Poništava se Odluka o izboru najpovoljnijeg ponuđača i dodjeli ugovora broj 01-11-11-03771-8/2022 od 8.9.2022. godine kojom je ugovor o javnoj nabavci usluga servisiranja i opravka službenih vozila Federalne uprave za inspekcijske poslove po provedenom postupku konkurentskog zahtjeva za dostavljanje ponuda uz primjenu e-aukcije dodijeljen ponuđaču „Saradis“ d.o.o. Sarajevo, a nakon što ponuđač nije u ostavljenom roku dostavio dokumentaciju kojom dokazuje da ispunjava uvjete tehničke i profesionalne sposobnosti u smislu člana 50. Zakona o javnim nabavkama BiH.

II

Ugovor o nabavci usluga servisiranja i opravke službenih vozila se dodjeljuje drugorangiranom ponuđaču "Connecta" d.o.o. Sarajevo sa ponudom broj 04-200-1/22 od 22.8.2022. godine, a ugovor će se zaključiti pod slijedećim uslovima:

- ukupna cijena bez uračunatog PDV-a 22.000,00 KM, odnosno 25.740,00 KM sa uračunatim PDV-om. U cijenu je uračunat popust od 48% koji je ponuđač ponudio u postupku e-aukcije.
- isporuka usluge će se vršiti sukcesivno u skladu sa potrebama Ugovornog organa
- ugovor će se zaključiti na period od 1 godine od dana zaključivanja istog, odnosno do maksimalnog ugovorenog iznosa
- rok plaćanja je 30 dana od dana prijema mjesečne fakture na protokol Ugovornog organa.

III

Izabarani ponuđač iz člana I odluke je dužan u roku od 5 (pet) dana od dana prijema odluke dostaviti ugovornom organu dokaze kojim dokazuje svoju ličnu sposobnost u skladu sa članom 45. Zakona o javnim nabavkama Bosne i Hercegovine, i to:

- uvjerenja nadležnih organa kojima se potvrđuje da je ponuđač izmirio svoje dospjele obaveze, a koje se odnose na doprinose za penziono i invalidsko osiguranje i zdravstveno osiguranje
- uvjerenja nadležnih organa kojima se potvrđuje da je ponuđač izmirio svoje dospjele obaveze u vezi sa plaćanjem direktnih i indirektnih poreza
- upotrebne dozvole za najmanje 3 dizalice kojima ponuđač raspolaže
- dokaze o kvalifikiranosti stručnog osoblja /2 automehaničara i jednog autoelektričara/.

Dokazi iz prethodnog stava ovog člana moraju biti original ili ovjerena kopija, s tim da datum izdavanja originala ne može biti stariji od 3 mjeseca prije dana dostavljanja ponude. Pod danom dostavljanja ponude smatra se dan koji je ugovorni organ odredio u Tenderskoj dokumentaciji kao krajnji rok za dostavljanje ponude.

Ukoliko ponuđač "Connecta" d.o.o. Sarajevo ne dostavi naprijed tražene dokaze u ostavljenom roku, isti će biti isključen iz daljeg učešća u postupku javne nabavke zbog neispunjavanja uslova za kvalifikaciju.

IV

Ova odluka će se objaviti na web stranici Federalne uprave za inspeksijske poslove.

O b r a z l o ž e n j e

Nabavka usluga servisiranja i opravka službenih vozila Federalne uprave za inspeksijske poslove je predviđena Planom nabavki Uprave za 2022. godinu, usluge redni broj 4, a procijenjena vrijednost nabavke je 41.000,00 KM bez PDV-a.

Dana 15.7.2022. godine na portalu javnih nabavki BiH je objavljeno obavještenje o nabavci predmetnih usluga, broj obavještenja 1292-7-2-19-3-16/22. Istovremeno sa objavljivanjem obavještenja, Tenderska dokumentacija je učinjena dostupnom potencijalnim ponuđačima na Portalu javnih nabavki, a ista je u skladu sa članom 80. stav (1) Zakona o javnim nabavkama BiH upućena na adrese 3 potencijalna ponuđača.

Dana 23.8.2022. godine u utvrđenom terminu izvršeno javno otvaranje blagovremeno pristiglih ponuda, te je u zapisniku sa otvaranja ponuda konstatovano da su ponude dostavili slijedeći ponuđači sa pročitanim vrijednostima ponuda:

Naziv/ime ponuđača	Ukupna cijena ponude (bez PDV-a)
„Guma M“ d.o.o. Mostar	30.009,34 KM
„Unitrade“ d.o.o. Ljubuški	57.851,98 KM
„Saradis“ d.o.o. Sarajevo	40.999,90 KM
„Conecta“ d.o.o. Sarajevo	42.307,80 KM

Javnom otvaranju ponuda nije prisustvovao predstavnik niti jednog od ponuđača koji su dostavili ponude, a zapisnik sa otvaranja ponuda je odmah putem pošte otpremljen na adrese ponuđača.

Komisija je izvršila provjeru kompletnosti i ispravnosti ponuda, na način da su provjeravani način uvezivanja, primjena propisane forme dokumenata koji su sastavni dio ponude, validnosti ponude, potpis ponude i ovjera, te je izvršen pregled obrazaca i drugih dokumenata.

Pregledom dokumentacije koju su dostavili ponuđači, a koja je propisana u tenderskoj dokumentaciji Komisija je utvrdila da su svi ponuđači dostavili dokumentaciju koja je zahtjevana u postupku javne nabavke.

Komisija je izvršila provjeru računске ispravnosti dostavljenih ponuda, te na te okolnosti nije utvrdila nedostatke odnosno greške u računanju.

Postupak e-aukcije je održan u terminu koji je komisija odredila, odnosno dana 2.9.2022. godine sa početkom u 9,30 sati, isti je trajao do 9,50 sati i u izvještaju je konstatovano da je uspješno proveden.

Konačne cijene ponuđene u postupku e-aukcije su prikazane u narednoj tabeli:

Naziv /ime ponuđača	Cijena sa otvaranja (sa PDV-om)	Evaluirana cijena (KM)	Umanjenje cijene u %	Suštinski odgovarajuća ponuda	Rang
„Saradis“ d.o.o. Sarajevo	40.999,90 KM	21.970,00 KM	46,41%	DA	1
„Conecta“ d.o.o. Sarajevo	42.307,80 KM	22.000,00 KM	48%	DA	2
„Guma M“ d.o.o. Mostar	30.009,34 KM	30.009,34 KM	0%	DA	3
„Unitrade“ d.o.o. Ljubuški	57.851,98 KM	57.851,98 KM	0%	DA	4

Imajući u vidu sve naprijed navedeno, Komisija je konstatovala da je u skladu sa kriterijem „najniža cijena“ najpovoljnija ponuda ona koju je dostavio ponuđač „Saradis“ d.o.o. Sarajevo, te je Direktor Federalne uprave za inspeksijske poslove dala preporuku da u ime ugovornog organa donese odluku kojom će ugovor dodijeliti navedenom ponuđaču. Direktor Uprave je prihvatio dostavljenu preporuku i donio odluku broj 01-11-11-03771-8/2022 od 8.9.2022. godine kojim je ugovor dodijeljen navedenom ponuđaču.

U daljem toku postupka, a prije zaključivanja ugovora o nabavci, ponuđač „Saradis“ d.o.o. Sarajevo je po prijemu odluke o dodjeli ugovora dostavio dokumentaciju kojom dokazuje da ispunjava uvjete iz člana 45. Zakona o javnim nabavkama Bosne i Hercegovine, kao i diplome kojim dokazuje kvalificiranost stručnog osoblja. Nakon izvršenog uvida u dostavljenu dokumentaciju, Komisija za javne nabavke je utvrdila da ponuđač nije dostavio upotrebne dozvole za 3 dizalice, za koje je u svojoj izjavi o opisu tehničke opremljenosti od 29.7.2022. godine koja je sastavni dio ponude naveo da posjeduje „4 (četiri) dvostubne dizalice sa upotrebnim dozvolama“. Postupajući u skladu sa članom 68. stav (3) Zakona o javnim nabavkama BiH, Komisija je svojim aktom broj 01-11-11-03771-9/2022 od 23.9.2022. godine pozvala ponuđača da u roku od 3 dana od dana prijema zahtjeva otkloni utvrđeni nedostatak na način da dostavi upotrebne dozvole za dizalice za koje je u izjavi naveo da posjeduje. Dana 28.9.2022. godine ugovorni organ je od ponuđača zaprimio akt broj 02-10a/2022 od 28.9.2022. godine u kojem se navodi da, obzirom da je dostavio zahtjevanu izjavu u originalu, te kako u samom procesu podnošenja ponuda nisu zahtjevano originalne upotrebne dozvole ili kopije istih kako je to zahtjevano sa diplomama o kvalificiranosti stručnog osoblja, smatra da nije dužan naknadno dostaviti upotrebne dozvole i da je shodno navedenom ispunio sve uvjete tehničke i profesionalne sposobnosti, pa ne nalazi da postoje razlozi za njegovo isključenje iz postupka.

Komisija nije mogla prihvatiti ovakvo obrazloženje, iz razloga koje navodi u nastavku.

Naime, nesporno je da je tenderskom dokumentacijom (tačka 3. pod b) predviđena obaveza ponuđača da dostavi izjavu o tehničkoj opremljenosti i osposobljenosti, koja pored ostalog podrazumjeva posjedovanje najmanje 3 dizalice sa upotrebnim dozvolama. Ponuđač „Saradis“ d.o.o. Sarajevo je nesporno i dostavio traženu izjavu. Ovakav zahtjev ugovornog organa je u skladu sa odredbom člana 44. stav (4) Zakona o javnim nabavkama BiH koja propisuje da *ugovorni organ od kandidata/ponuđača zahtjeva samo one dokaze koji su neophodni da bi se utvrdilo da li kandidat/ponuđač zadovoljava kvalifikacijske uvjete koje je postavio ugovorni organ*. Dakle, Zakon o javnim nabavkama BiH utvrđuje obavezu za ugovorne organe da u fazi podnošenja ponuda ne opterećuju ponuđače zahtjevima za dostavljanje preobimne dokumentacije i stvaranju bespotrebnih troškova, što svakako predstavlja zahtjev za dostavljanje izjave u konkretnom slučaju. Međutim, tenderskom dokumentacijom, i to pomenutom tačkom 3. je utvrđena obaveza za ponuđača **kojem bude dodijeljen ugovor** da dostavi dokaze kojima se potvrđuju okolnosti iz date izjave, što se nesporno odnosi i na

upotrebne dozvole za dizalice. S tim u vezi, a radi otklanjanja bilo kakvih nejasnoća, kao i davanja mogućnosti ponuđaču „Saradis“ d.o.o. Sarajevo da dostavi upotrebne dozvole za dizalice za koje je datom izjavom iskazao da posjeduje, komisija je naknadno, aktom od 23.9.2022. godine tražila dostavljanje upotrebni dozvola koje ponuđač nije dostavio uz gore pomenuto izjašnjenje, nakon čega je konstatovano da isti ne ispunjava kvalifikacione uvjete koji se odnose na tehničku i profesionalnu sposobnost, te da je shodno tome njegovu ponudu potrebno odbaciti u skladu sa članom 68. stav (1) Zakona o javnim nabavkama BiH.

Slijedom navedenog, komisija je utvrdila da su ispunjeni uvjeti iz člana 72. Zakona o javnim nabavkama Bosne i Hercegovine, odnosno da se ugovor dodijeli ponuđaču čija ponuda po rang-listi je odmah nakon ponude najuspješnijeg ponuđača, te je shodno navedenom direktoru Uprave dostavila preporuku broj 01-11-11-03771-10/2022 od 30.9.2022. godine.

Nakon razmatranja dostavljene preporuke Direktor Federalne uprave za inspekcijske poslove nije našao razloge, nepravilnosti niti propuste u radu koji bi eventualno predstavljali osnov za neprihvatanje preporuke Komisije za javne nabavke, te je odlučio kao u dispozitivu.

Pouka o pravnom lijeku: Protiv ove odluke može se izjaviti žalba ugovornom organu u pismenoj formi u roku od 5 (pet) dana od dana prijema iste.



Dostaviti:

1. "Connecta" d.o.o. Sarajevo, Osik 6, 71210 Ilidža-Sarajevo
2. „Saradis“ d.o.o., Donji Hotonj bb, 71320 Vogošća
3. „Guma M“ d.o.o. Mostar, Bišće polje bb, 88000 Mostar
4. „Unitrade“ d.o.o. Ljubuški, Hrvatskih kraljeva 23, 88320 Ljubuški
5. Sektor za materijalno-finansijske poslove
6. Sektor za tehničku podršku i plansko-analitičke poslove
7. Komsija za javne nabavke (a/a).

05-10-2022
I.T.